



19. august 2009

UKA 2009/38

Inatsisartut Suleriaasianni § 35 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

### **Kalaallit Nunaata IWC-mi ilaasortaanera pillugu nalilersuisoqarnissaanik apeqquteqaat aallaavigalugu oqallinnissamik siunnersuut.**

(Inatsisartunut ilaasorta Hans Aronsen, Inuit Ataqatigiit)

#### **Tunngavilersuut:**

Ukiut kingulliit annertusigaluttuinnartumik nunatta avataaniit uumasunik illersuonianermik suliniuteqartut nunat tamalaat akornanni suliniaqatigiiffissuarni assigiingitsuni nukittunerugaluttuinnartumik inissisimasoqarnerat pissutigalugu nunatsinni nutatta pissarititaannik immitsinnut pilersorniarneput ajornartorsiortinneqaraluttuinnarpoq.

Nunat tamalaat akornanni arfanniartarneq pillugu ataatsimiititaliarsuarmi IWC-mi sulineq eqqarsaatigalugu tassani aamma uumasunik illersuiniaqatigiit annertuumik sunniuteqarnerat pissutigalugu nunatta arfanniarnermut soqutigisai aamma nunatta inuisa neqissaqarniarnerat eqqarsaatigalugu ukiuni kingullerni annertusiartortumik suussupagineqarput. Taamaalillutalu inuussutissanik sulii annertusiartortumik nunatta avataaniit pisisariaqarnitsinnik pituttugaavugut, tamannalu iliuseqarfigineqartariaqalerpoq.

*Ilisimavarputkingullermik Naalakkersuisuusimasut ukioq manna IWC-mi  
ilaasortaajunnarsinnaanermut tungasumik Qallunaat Nunaanni Naalakkersuisunut  
saaffiginnissuteqarernikuusut. Naalakkersuisut taamatut saaffiginnissuteqarnerminni  
Inatsisartunik tunuliaqutserneqarnissamik noqqaassuteqarsimangillat. Isumaqarpungalu  
apeqqutini taama pingaaruteqartigisuni mianernarsinnaasunilu sapinngisamik susassaqartut  
tamarmik tusarniarneqarsimanissaat pingaaruteqartoq.*

Taamaammat Inuit Ataqatigiinnit isumaqarpugut pisariaqartoq IWC-mi ilaasortaanerput ingerlatiinnassaneripput nalilersortariaqaripput, IWC-miillu ilaasortaajunnarnissamik siunniussaqaarutta suut periarfissaappat? Aamma IWC-mi ilaasortaanerup suut pitsaaqutiginerai suullu ajoqutiginerai nalilersortariaqarpavut. Piniartut Aalisartullu Kattuffiat KNAPK kattuffiillu allat tamatumunnga attuumassuteqarsinnaasut qanoq isumaqarpat?

Qanoq iliorluta aaqqissuussamik nunatta pissarititaannik immitsinnut pilersornissarput pitsaanerusoq angusinnaavarput? Suliniaqatigiiffiit suut neqissaqarniarneput inuussutissaqarniarnepullu eqqarsaatigalugit suleqatigigutsigik angusassaqaqarnerussuugut?